

滇  
繫

滇繫書目

趙州師  
範荔扉纂輯

藝文第三冊

朱有勳

明

汝南王周王子

無爲寺碑

范言

大理府同知浙江人

點蒼山神祠記

王奎

董莊敏死節感楚序

楊慎

大理府志序

董玘

侍郎浙江會稽人

送雲南守劉君景晦序

諸葛元聲

諸生浙江蘭溪人

滇史自序

劉綎

副總兵南昌人

擒岳鳳奏捷露布

陳用賓

巡撫福建晉江人

孝節婦傳

王守仁

南贛巡撫封新建伯浙江餘姚人

書六通

楊慎

寫韻樓論轉注書

張居正

太師大學士湖廣江陵人

十三札

楊慎

兵備道姜龍去思碑

漢書

陳于廷 左都御史江南宜興人

王元翰墓表

陸深

祭楊邃菴文

蔡毓榮 本朝綏遠將軍雲貴總督錦州人

籌滇十疏

楊名時

江南江陰人康熙辛未進士禮部尚書謚文定

飭定夫徭示 永禁加煎壓散示

滇繫

藝文繫

趙州師 範荔屏纂輯

明汝南王朱有勳無爲寺記

葉榆多名山紫城西北有曰銀溪山者蒼蒼山名峯之一其麓有溪出自峯之北崦其濶約二十弓許東流入洱海寒泉清冽可飲可濯時雨仁晴飛瀾走湍冷然可聽溪之旁多秀石香草翠肌而玉脉碧葉而金花好事者往往取爲軒窗之玩繇溪而入榛莽蒙翳路若窮然思欲回履忽聞絕壁峭巖之間有人聲知爲幽勝之所遂披藤捫蘿且歇且進歷幽巒躡石磴翛然若

飄浮騫騰則身已在萬頃雲上矣流盼容與愈進愈佳松濤響  
空蘭氣襲人乃忘其向之疲也行可數里兩山豁然奇秀疊出  
中有龍象之宮數緇衣導余以入燒枯松煮寒泉有名龍苑菴  
者構於風篁雲木之杪海霞島雲來吾目中天風虛嵐牽衣縈  
髮余卽牀跏趺對僧無語不覺時移而夕陽在木末矣余樂安  
佚愛清潔故自髫歲已抱塵表之想以時多乖不克旣遂重蒙  
伯父皇上拯余於萬死之中置之極安之地心怡身榮故得探  
此勝事亦足以愜素懷譬池魚籠鶴游泳翱翔於巨壑青冥向  
之所謂潔清者其或庶幾乎噫蘭亭不遇右軍則修竹蕪於榛

棘清流混於汙池矣是峯也使余不記其梗概則山川秀氣湮沒於遐陬將來豈不爲雲林之愧歟

范言蒼山神祠記

蒼山麓有神祠于蒙氏時僞封中嶽元初又稱龍神似瀆且僭嘉靖改元兵憲姜公龍釐而正之曰蒼山神云山首崑崙雄鎮一方載諸祀典丙辰歲廟被火郡父老請新之木石之工俱出之民勸導奔走則楊權與有力焉越明年廟成視昔加倍適太守楊公仲瓊至廼謁廟而落之民甚謹也明年同知范言且北上郡父老請記於時見尸祝者以絳帛纏青蛇入於府城號於

衆曰此蒼山神也人聚而觀之亦曰真蒼山神也怪民之瀆神而未達禮因作詩三章俾祀神者歌之其一迎神曰羌社日兮辰良修祀事兮孔臧明余發兮至止肅冠履兮趨蹌穆將愉兮恐後思神德兮無疆奠坤極兮底定習坎澤兮汪洋嗟英爽兮冥寞赫威靈兮堂堂其二降神曰白雲祈祈兮神監余而來降靈雨灑空兮忽淒其而以風繽諸從兮如水駕萬馬兮騰空揮旗而搖搖兮擁幢蓋揚靈其剌剌兮閃電虹矣鸞笙兮噦噦發鼙鼓兮逢逢雜椒漿兮蓀莖藉蘭肴兮蕙叢拜稽首兮休享賴神錫兮年豐其三送神曰神之逝兮俛俛悵靈修兮曾莫余阻挾

魚鯢兮在天射狼星兮如雨聳長劒兮殪媚狐操短兵兮族碩  
鼠來克余佑兮去亦余撫田穰稔兮林有檉橘豈無崑崙兮兼  
爾梁父於維點蒼兮永鎮茲土

王奎董莊愍死節威楚序

龍亡虎逝而羣狐嗥風披雲靡而雷霆作此可以覩大人之變  
明治化之迹也按元史龍溪集紀天歷初雲南中慶路鎮將敗  
狐叛遣兵攻威楚官吏或逃或屈獨知事董文彥義不從賊銳  
聲詬罵賊不忍聞截其耳以塞其口文彥嚼血唾賊罵不絕聲  
賊怒裂而殉之明年敗狐伏誅憲司以事聞朝廷嘉其忠

愍旌其門官其子時中予斥臨安時中爲文學掾一如集中言  
泣且請曰先父不幸死賊手雖褒嘉于朝時中懼其事之荒湮  
也先生以文章顯幸爲我序之嗚呼忠臣烈士何代無之求之  
遠服曾不多見昔安祿山以范陽反顏杲卿死河北張巡許遠  
死睢陽雖武夫小卒皆知盡節闔城皆然華夏忠義之習無怪  
也唐史列之於傳植大義于後世者至矣敗狐之叛中慶大藩  
也威楚大都也省府大臣不死之風紀執法不死之刺史不死  
之知事未吏耳食九品秩乃凜凜乎仗大義樹大節甯死而不  
顧見理明而臨事不眩也使天下之人皆若文彥則叛亂何繇

326.1299  
而生哉予生也後仕不先人不獲與太史著作之列而元史不載莊愍死節事豈史闕歟抑在遠略歟抑述史時雲南未附不得聞歟以未附闕文君子固不能無憾以在遠而略則失之矣因爲迷之於簡以補史氏之闕云

楊慎大理府志序

大理滇西繁雄郡也緣洱水出罷谷爲西南巨浸蒼山像靈鷲爲西南巨鎮而襟帶而巖險而物華而人英又褒然育煥然縉犁然有當於中土之奧區卓乎無謝於南溟之奇甸焉嘗稽之往籍緯書云神農地過日月之表則日表骨利月表青邱滇池

比之猶爲邇封陸終爲皇帝之所娶若水爲顓頊之所生產里  
爲湯亳之貢國濮人爲武牧之征隊載籍昭然可以覆視奚待  
常頌爲邇道始而唐蒙爲開郡先乎昔之郡乘方志事狀行紀  
若韋臯若徐雲虔若竇滂若樊綽若韋齊休若陳隱之所著雖  
曰臚列實則錄存書亡若勝國之李景山昭代之王景常籍焉  
具存然或失之誤或失之略山河若柯戒而以一經行盡之幅  
員數千里而以一卷帙約之原本山川有憑其能說極命草木  
無裨於多識矣柱史溫泉郝公繙舊志而病之乃徵議於督學  
憲使黜泉吳公參伯龍山沈公僉憲膠峯安公板令於太守黃

巖蔡公蔡公奉楮及幣禮謁給諫宏山楊公荆守侍御中谿李公二公家本郡人官舊史氏多識前代之載且諸士著之詳於是攄懷舊之蓄念發思古之幽情立創新例大增舊文閱數月而新志成集二美而卷帙合時則黃巖公政成化流之暇宅生居方之餘也而古跡英躔琳宮寶地表昔賢之遺愛供騷人之景物者一一鼎新之賁飾之輪之奐之詠之榜之不翅柳吳興之蘋洲謝宣城之疊嶂矣其爲新志之助不亦多乎慎也恩譴裔土流戍滇陰紫城蒼麓夙嘗受館僦居香界珙岑昔饒解鞍橫枕乃以首簡屬之孱毫非敢曰僭杜征南之先固願附張京

兆之後云爾

董玘送雲南守劉君景晦序

吾鄉劉君景晦磊落士也少挾奇負年幾四十始成進士益砥礪檢押欲自表見及官刑曹曰吾甯不能析律骹令采譽稱毋害哉顧吾心不可故折獄獨不爲奇請他比一視法上下自爲主事爲員外郎爲郎中皆然今年秋擢守雲南郡或私謂君得無難遠道與則笑曰受命爲守敢憚遠爲然則易遠方歟曰爨焚亦吾民也吾何敢易或以語予予曰君言固當且不見夫爲車者乎輻輳輳軫式較木皆可爲也至于爲輪其材必以檀非

是不甌則折矣豈非以其材堅其行遠完久也哉用君于遠殆類是矣且家君嘗爲是郡其政與俗吾知之凡郡之所轄爲州者四爲縣者九而地之所出民之所食者不能當中土一縣環十里而爲州及三四里而爲縣其始特爲控制夷民之慮故以吏多而安而其久也民亦以吏多而病矧郡居藩省下徵役視他郡恒倍焉而皆取之披氊椎髻之民役有更而歲無休嘻亦病甚矣然而其民擔負茹朘忍死以趨事而不能自達者遠故也而吏于其土者水涉山行凡萬里戒朝奔夜變更寒暑而後至道塗之險凌冒之虞接于其形而動于其慮其不私便其身

圖而修百姓之急者小吏百一長吏十一而黜陟之典又常不當于幽明亦惟其遠也民以其遠既病而不能自達故盜恒多吏以其遠既至而惟身之圖故政恒廢蓋家君之始至也幾不可理咨弊而鏹擱強而決逆鑄而漑籍侵漁蠲逋負倉庾出納賦役下上凡有司之政一更其舊而民少息茲家君去郡又十餘年其所規立存與否予不能知然民告病如予所知者必益以甚矣蓋其勢非得賢守制力堅而榦局完者無以宣上德而懷遠民宜君之往也夫古之立功名者固多奮迹于遠君不難遠道豈爲私便之圖不易遠民必有惠綏之政吾知其宣力致